

Giuseppe Gangale – in meridiunal en servetsch per la scoletta rumantscha

Saira rumantscha cun Chasper Pult a Preaz

■ **(Ir) En il rom da l'acziun «Rumàntsch an la regiun Tumleatga/Mantogna» envida la Lia Rumantscha gievgia, ils 24 da matg a las 20.15 en chasa da scola a Preaz ad ina saira rumantscha en questa regiun. Il linguist Giuseppe Gangale e ses engaschament en favur da la scoletta rumantscha en Sutselva vegn ad esser il tema da la saira.** La Lia Rumantscha envida per la segunda giada il romanist e promotur da cultura *Chasper Pult* da discurren ina saira da Giuseppe Gangale. Quai mussa quant impurtant che quest um e ses engaschament durant ils onns 1940 è stà per il svilup dal rumantsch en Sutselva. L'emprim referat il zercladur 2011 ha tematisà l'engaschament dal linguist calabres-alban per l'idiom sutsilvan en general. La segunda saira metta en il center las scolettas rumantschas.

«Ondas» sa regordan

Per Gangale era la fundaziun da scolettas rumantschas en la regiun Mantogna, Tumleatga e Val Schons in punct central en ses cumbat per dar dapli forza al rumantsch sutsilvan. Sper il svilup d'ina grammatica ed ortografia sutsilvana vuleva el uschia rinforzar il svilup da sutenisi, cun educar rumantsch la generaziun

giuvna. El ha tschertgà dunnas giuvnas e scolà quellas per ch'ellas possian lavurar sco «ondas» da scoletta en las vischnancas sutsilvanas. Giuseppe Gangale las ha era accompagnà e tgirà durant la lavur uschia ch'ellas han emprendì ad enconuscher quest meridiunal cun caracter difficil. Duas da las anteriuras mussadras vegnan a raquintar a Preaz davart lur lavur en las scolettas e davart lur contacts cun Gangale.

Program sin giavisch 2012

La Lia Rumantscha vul puspè dar ina vusch al rumantsch en la regiun Mantogna/Tumleatga. A chaschun da la saira da divertiment cun Radiotelevision Svizra Rumantscha a Cazes dals 14 da mars 2012 han ils Rumantschs che vivan en questa regiun exprimì envers la Lia Rumantscha tranter auter il giavisch ch'ella organiseschia regularmain occurrenzas rumantschas en la regiun. La Lia Rumantscha vul ademplir quest giavisch e vegn a preschentar la stad il program regional per la segunda mesadad 2012.

L'arranschament a Preaz è public e gratuit e cumenza a las 20.15 en chasa da scola a Preaz. Suentar il referat datti in puschegn. Contact: 081 630 70 50, www.liarumantscha.ch